

Službene novine Kantona Sarajevo, broj 26/16

Na osnovu čl. 12. tačka b) i 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13), Skupština Kantona Sarajevo, na sjednici održanoj dana 30.05. 2016. godine, donijela je

ZAKON

O NAUČNOISTRAŽIVAČKOJ DJELATNOSTI

DIO PRVI - OSNOVNE ODREDBE

Član 1. (Predmet Zakona)

Ovim zakonom utvrđuje se poseban interes Kantona Sarajevo (u daljnjem tekstu: Kanton) u oblasti nauke i tehnologije, osnovni principi naučnoistraživačke djelatnosti, sudjelovanje u ostvarivanju međunarodne naučnoistraživačke saradnje i ostvarivanje naučnoistraživačke saradnje u Kantonu i Bosni i Hercegovini, finansiranje naučnoistraživačke djelatnosti, formiranje Savjeta za nauku Kantona Sarajevo (u daljnjem tekstu: Savjet za nauku), informacioni sistem i vođenje evidencija u vezi sa obavljanjem naučnoistraživačke djelatnosti, opća pitanja u vezi sa osnivanjem naučnoistraživačkih instituta kao organizacionih i podorganizacionih jedinica visokoškolskih ustanova i naučnoistraživačkih instituta kao ustanova, prava i obaveze nadležnih organa u oblasti naučnoistraživačke djelatnosti, nadzor nad provedbom ovog zakona i druga pitanja od značaja za obavljanje naučnoistraživačke djelatnosti na području Kantona.

Član 2. (Definicija naučnoistraživačke djelatnosti)

(1) Naučnoistraživačka djelatnost predstavlja sistemski stvaralački rad na usvajanju novih znanja s ciljem podizanja općeg civilizacijskog nivoa društva i korištenje tih znanja u svim oblastima društvenog i privrednog razvoja, uključujući i razvoj tehnologije i njihovu primjenu.

(2) Naučni i tehnološki razvoj ima prioritetan značaj za razvoj Kantona i sastavni je dio međunarodnog, posebno evropskog naučnoistraživačkog prostora.

Član 3. (Poseban interes za Kanton i ostvarivanje posebnog interesa)

(1) Naučnoistraživačka djelatnost je od posebnog društvenog interesa za Kanton.

(2) Poseban interes i strateški ciljevi u naučnoistraživačkoj djelatnosti na području Kantona, u smislu ovog zakona, ostvaruju se, pored ostalog, putem:

a) stvaranja mogućnosti za intenzivni i usklađeni razvoj nauke i tehnologije;

- b) stvaranja uslova za podsticanje naučnoistraživačkog rada koji je u funkciji tehnološkog, inovacionog i ukupnog društveno-ekonomskog razvoja;
- c) utvrđivanja osnovnih principa koordinacije naučnoistraživačke djelatnosti;
- d) povezivanja planova razvoja naučnoistraživačkog rada sa strategijom razvoja privrednih kapaciteta;
- e) međunarodne naučne saradnje;
- f) školovanja i usavršavanja novih generacija naučnika na visokoškolskim ustanovama u Kantonu, Bosni i Hercegovini ili inozemstvu;
- g) ostvarivanja saradnje naučnoistraživačkih i visokoškolskih ustanova sa odgojno-obrazovnim ustanovama i ustanovama iz oblasti kulture;
- h) unapređenja sistema naučno-tehnoloških informacija;
- i) razvoja istraživačke infrastrukture prema međunarodnim standardima;
- j) reinvestiranja u industrijsko istraživanje;
- k) realizacije naučnoistraživačkih programa u skladu sa Strategijom za razvoj nauke Kantona Sarajevo (u daljnjem tekstu: Strategija za razvoj nauke) i Bosne i Hercegovine;
- l) provođenja aktivnosti na popularizaciji nauke i naučnoistraživačkog rada.

Član 4. (Principi)

- (1) Naučnoistraživačka djelatnost zasniva se na principu povezanosti osnovnih, primijenjenih i razvojnih istraživanja.
- (2) Naučnoistraživačka djelatnost u Kantonu zasniva se na sljedećim principima:
 - a) slobodi i autonomiji stvaralaštva;
 - b) konkurentnosti naučnih programa i projekata;
 - c) primjeni međunarodnih standarda i međunarodnih mjerila kvaliteta u oblasti nauke;
 - d) decentraliziranom uređenju i policentričnom organiziranju u oblasti nauke;
 - e) javnosti rada i rezultata tog rada koji su podložni naučnoj i stručnoj kritici;
 - f) etičnosti naučnoistraživačkog osoblja;
 - g) saradnji s domaćim i međunarodnim institucijama u oblasti nauke i istraživanja;
 - h) povezanosti sa sistemom visokog obrazovanja i odgojno-obrazovnim ustanovama na svim nivoima;
 - i) zaštiti intelektualnog vlasništva, ljudskih prava, te lične i opće sigurnosti;
 - j) brizi za održiv razvoj i zaštitu okoliša;
 - k) potrebama privrednog i društvenog razvoja;

l) poticanju i uvažavanju specifičnih sadržaja od značaja za Kanton i BiH.

Član 5. (Sloboda naučnog rada i djelovanja)

Naučni rad ne podliježe nikakvim ograničenjima ili formalnim zahtjevima osim onih koji proizilaze iz poštivanja standarda i etičnosti u naučnoistraživačkom radu, zaštite ljudskih prava, zaštite lične i opće sigurnosti na radu, kao i zaštite okoline.

Član 6. (Rezultat naučnoistraživačkog rada)

(1) Rezultati naučnoistraživačkog rada mogu biti:

- a) naučni i stručni rad objavljen u referentnom naučnom časopisu;
- b) naučna knjiga ili monografija;
- c) originalni naučni ili pregledni članak;
- d) naučni elaborat i izvještaj,
- e) saopštenje ili rad objavljen u zborniku s naučnog skupa;
- f) pozvano predavanje na naučnom skupu;
- g) objavljena naučna kritika ili polemika;
- h) leksikografska ili enciklopedijska jedinica;
- i) kartografska publikacija;
- j) magistarski i doktorski rad;
- k) nova sorta, patent, tehnička rješenja, nove metode, novi materijali te novi tehnološki postupak.

(2) Rezultat naučnoistraživačkog rada mora sadržavati elemente originalnosti i inovacije, tj. novih spoznaja, novih znanja, novih naučnih pravila ili novih primjena.

Član 7. (Ostvarivanje naučnoistraživačke djelatnosti)

(1) Naučnoistraživačka djelatnost obuhvata i ostvaruje se povezivanjem osnovnog (fundamentalnog), primijenjenog (aplikativnog) i razvojnog istraživanja te osposobljavanjem kadra za obavljanje naučnoistraživačke djelatnosti.

(2) Osnovno (fundamentalno) istraživanje podrazumijeva teorijski i eksperimentalni rad usmjeren ka novim spoznajama radi dobijanja naučno primjenjivih istraživanja sa dugoročnim ciljevima primjene.

(3) Primijenjeno (aplikativno) istraživanje je stvaralački rad usmjeren ka dobijanju naučno primjenjivih rezultata.

(4) Razvojno istraživanje je stvaralački rad zasnovan na rezultatima osnovnog i primijenjenog istraživanja i iskustava usmjeren na stvaranje novih odnosno poboljšanje postojećih tehnologija, proizvoda i procesa.

(5) Osposobljavanje kadra za obavljanje naučnoistraživačke djelatnosti, u smislu ovog zakona, podrazumijeva podršku i stvaranje uslova za sticanje akademskih i naučnoistraživačkih zvanja odnosno sticanje novih i proširivanje stečenih znanja.

(6) Naučnoistraživačku infrastrukturu čine objekti i oprema za obavljanje naučnoistraživačke djelatnosti (laboratorije,

postrojenja, ispitne stanice, biblioteke, naučno izdavaštvo i drugo).

DIO DRUGI - PODRŠKA NAUČNOISTRAŽIVAČKOJ DJELATNOSTI

Član 8. (Osiguranje finansijskih sredstava za naučnoistraživačku djelatnost)

- (1) Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu do 2% Budžeta Kantona s tim da taj iznos sredstava ne može biti manji od 0,65%, kao i iz drugih izvora u skladu sa zakonom.
- (2) Sredstva iz stava (1) ovog člana biće utrošena u skladu Strategijom za razvoj nauke, a 5% od izdvojenih sredstava iz stava (1) ovog člana namijenjena su za podršku projektima koji su od posebnog interesa za Kanton.
- (3) Vlada Kantona Sarajevo (u daljnjem tekstu: Vlada), na prijedlog ministra za obrazovanje, nauku i mlade Kantona Sarajevo (u daljnjem tekstu: ministar) uz prethodno pribavljeno mišljenje Savjeta za nauku, donosi odluku kojom se utvrđuju kriteriji za utrošak sredstava iz ovog člana.
- (4) Ministar prije utvrđivanja prijedloga odluke iz stava (3) ovog člana provodi konsultacije sa Savjetom za nauku.
- (5) Sredstva iz stava (1) ovog člana, izuzev sredstava rezerviranih u skladu sa stavom (2) ovog člana, koriste se za ulaganje u osposobljavanje kadrova za naučni i istraživački rad, usavršavanje naučnoistraživačkog osoblja, za razvoj i uvođenje nove naučnoistraživačke infrastrukture te poticanje naučnoistraživačkih i istraživačkorazvojnih projekata od interesa za Kanton i razvoj naučnoistraživačke djelatnosti u skladu sa ovim zakonom.
- (6) Za namjene iz stava (5) ovog člana sredstva se, u skladu sa odlukom iz stava (3) ovog člana dodjeljuju u postupku javnog oglašavanja od strane Ministarstva za obrazovanje, nauku i mlade Kantona Sarajevo (u daljnjem tekstu: Ministarstvo).
- (7) Godišnji izvještaj o utrošku sredstava za razvoj naučnoistraživačke djelatnosti odobrenih u Budžetu Kantona u skladu sa ovim zakonom Ministarstvo podnosi Vladi.

DIO TREĆI - STRATEGIJA ZA RAZVOJ NAUKE

Član 9. (Izrada i sadržaj Strategije za razvoj nauke)

- (1) U svrhu ostvarivanja strateških ciljeva, definiranja smjernica i prioriteta naučnog i tehnološkog razvoja Kantona i Bosne i Hercegovine, odnosno ostvarivanja posebnog interesa u naučnoistraživačkoj djelatnosti, donosi se i provodi Strategija za razvoj nauke.
- (2) Strategija za razvoj nauke predstavlja osnovu za podsticanje i realizaciju naučnoistraživačkog i istraživačkorazvojnog rada u Kantonu i donosi se svakih pet godina.
- (3) Strategija za razvoj nauke sadrži osnovne principe, ciljeve, smjernice i prioritete naučnog i tehnološkog razvoja, s posebnim osvrtom na:
- a) ciljeve koji se u ovoj oblasti žele dostići na nivou Kantona;
 - b) naučna područja i uže naučne oblasti koje treba posebno razvijati i materijalno podržavati radi dostizanja ciljeva u razvoju Kantona i Bosne i Hercegovine;
 - c) prioritetne potrebe u naučnoistraživačkoj djelatnosti i prioritete ulaganja u naučnoistraživačke i istraživačkorazvojne projekte u narednom petogodišnjem periodu;

d) definiranje časopisa i publikacija čije je izdavanje od posebnog interesa za Kanton;

e) program podrške za naučnoistraživačku infrastrukturu;

f) program podrške za osposobljavanje kadra za naučnoistraživački i istraživačkorazvojni rad i za usavršavanje naučnika od interesa za Kanton;

g) ostale odrednice koje su od značaja u kreiranju strategije i politike u nauci i naučnoistraživačkoj djelatnosti (period ažuriranja i redefiniranja ciljeva koji se žele doseći u narednom petogodišnjem periodu, program razvoja sistema naučnih informacija i objavljivanja dostignuća naučnoistraživačke djelatnosti, program učešća u međunarodnim naučnoistraživačkim i istraživačkorazvojnim projektima i drugo).

Član 10. (Izrada i usvajanje Strategije za razvoj nauke)

(1) Nacrt Strategije za razvoj nauke priprema Savjet za nauku i dostavlja ga Ministarstvu.

(2) Strategiju za razvoj nauke donosi Skupština Kantona Sarajevo (u daljnjem tekstu: Skupština) na prijedlog Vlade.

DIO ČETVRTI - SAVJET ZA NAUKU

Član 11. (Osnivanje i rad Savjeta za nauku)

(1) S ciljem praćenja i unapređenja stanja u oblasti nauke i tehnologije u Kantonu osniva se Savjet za nauku kao stručno i savjetodavno tijelo Ministarstva.

(2) Savjet podnosi Ministarstvu izvještaj o svom radu i stanju u oblasti naučnoistraživačkog rada na području Kantona najmanje jednom godišnje.

(3) Ministarstvo može od Savjeta za nauku zatražiti dostavu određenih informacija ili stavova sa prijedlogom mjera za unapređenje stanja u oblasti naučnoistraživačkog rada ili u oblasti visokog obrazovanja i u kraćem vremenskom intervalu od roka utvrđenog u stavu (2) ovog člana.

Član 12. (Imenovanje Savjeta za nauku)

(1) Članove Savjeta za nauku imenuje ministar u roku od tri mjeseca od dana stupanja na snagu ovog zakona.

(2) Za predsjednika Savjeta za nauku imenuje se kandidat sa zvanjem doktora nauka koji posjeduje iskustvo u multidisciplinarnim istraživanjima i međunarodno prepoznate reference i iskustvo u naučnoistraživačkoj djelatnosti i djelatnosti visokog obrazovanja.

(3) Članovi Savjeta za nauku imenuju se na period od četiri godine, uz mogućnost ponovnog imenovanja.

(4) Odlukom ministra o osnivanju Savjeta za nauku preciznije se utvrđuje sastav, mandat, prava, obaveze, naknada za rad te druga pitanja značajna za rad Savjeta za nauku.

(5) Savjet se sastoji od devet članova i to:

a) osam članova istaknutih naučnih radnika sa akreditovane visokoškolske ustanove ili naučnog instituta registrovanog na području Kantona, pri čemu se vodi računa o zastupljenosti temeljnih naučnih oblasti;

b) istaknuti privrednik sa područja Kantona.

(6) Predsjednika Savjeta za nauku imenuje i razrješava ministar, a članovi glasanjem određuju jednog od članova za zamjenika predsjednika Savjeta za nauku.

(7) Mandat zamjenika predsjednika prati mandat predsjednika Savjeta za nauku.

(8) Član Savjeta za nauku ne može biti rektor i prorektor univerziteta, dekan i prodekan organizacione jedinice univerziteta, direktor naučnoistraživačkog instituta kao ustanove i direktor visoke škole.

(9) Članovi Savjeta za nauku imaju pravo na mjesečnu naknadu u zavisnosti od provedenih aktivnosti i ostvarenih rezultata na realizaciji poslova iz nadležnosti Savjeta za nauku.

(10) Odluku o iznosu naknade donosi ministar.

(11) Poslovníkom o radu utvrđuje se način rada, sazivanje sjednica, odlučivanje i druga pitanja bitna za rad Savjeta za nauku.

(12) Administrativne poslove za potrebe Savjeta za nauku obavlja sektor za oblast visokog obrazovanja i nauke u sastavu Ministarstva.

Član 13. (Nadležnost Savjeta za nauku)

Savjet za nauku je nadležan da:

a) daje preporuke i mišljenja s ciljem razvoja, finansiranja i unapređenja stanja u oblasti nauke i tehnologije u Kantonu;

b) izrađuje nacrt Strategije razvoja nauke;

c) prati provođenje Strategije razvoja nauke u Kantonu i daje preporuke i mišljenja Ministarstvu prilikom donošenja provedbenih akata (akcioni planovi, smjernice i sl.);

d) daje mišljenje o međusobnoj povezanosti Strategije razvoja nauke u Kantonu i Strategije za razvoj visokog obrazovanja Kantona Sarajevo i potrebi njihovog usklađivanja;

e) vrši procjenu stanja u oblasti naučnog i istraživačkog rada i oblasti visokog obrazovanja te daje preporuke ministru u pogledu preduzimanja mjera i aktivnosti za unapređenje stanja u oblasti nauke i visokog obrazovanja u Kantonu;

f) daje mišljenje u vezi sa strateškim pravcima budućeg rada i djelovanja visokoškolskih ustanova u oblasti naučnoistraživačkog rada i visokog obrazovanja;

g) predlaže Ministarstvu aktivnosti u oblasti naučnoistraživačke djelatnosti i visokog obrazovanja;

h) priprema i po zahtjevu ministra izrađuje nacрте strateških dokumenata i podzakonskih akata u oblasti nauke;

i) priprema i Ministarstvu predlaže instrumente za statističko praćenje stanja u oblasti nauke i tehnologije u Kantonu;

j) daje preporuke o učešću Kantona u programima Evropske unije iz oblasti nauke i tehnologije;

k) daje preporuke u pogledu podrške projektima u oblasti nauke i tehnologije od posebnog interesa za Kanton;

l) daje mišljenje u vezi sa ostvarivanjem međunarodne saradnje u oblasti nauke i tehnologije;

m) daje preporuke u pogledu definiranja sistema naučnoistraživačkih informacija u skladu s međunarodnim standardima;

n) obavlja i druge poslove koje mu povjeri ministar.

Član 14. (Prijevremeno razrješenje)

(1) Član Savjeta za nauku može biti razriješen i prije isteka vremena na koje je imenovan, i to:

- a) u slučaju gubitka sposobnosti za izvršavanje obaveza člana Savjeta za nauku;
- b) ako uredno i savjesno ne ispunjava obaveze člana Savjeta za nauku;
- c) ako svojim djelovanjem i ponašanjem povrijedi ugled Savjeta za nauku;
- d) na vlastiti zahtjev.

(2) Obrazloženi prijedlog za utvrđivanje postojanja okolnosti za razrješenje predsjednika ili člana Savjeta za nauku ministru može podnijeti predsjednik ili tri člana.

(3) Utvrđivanje postojanja okolnosti za razrješenje predsjednika ili člana Savjeta za nauku može pokrenuti i ministar.

DIO PETI - NOSIOCI NAUČNOISTRAŽIVAČKE DJELATNOSTI I POSTUPAK OSNIVANJA

Član 15. (Nosioi naučnoistraživačke djelatnosti)

Naučnu i istraživačku djelatnost na području Kantona obavljaju:

- a) Univerzitet u Sarajevu sa organizacionim jedinicama;
- b) akreditovane visokoškolske ustanove kao ustanove sa organizacionim jedinicama registrovane na području Kantona;
- c) naučnoistraživački instituti kao ustanove registrovani na području Kantona;
- d) akademsko i naučnoistraživačko osoblje upisano u Registar iz člana 19. stav (7) ovog zakona;
- e) Akademija nauka i umjetnosti Bosne i Hercegovine.

Član 16. (Postupak osnivanja)

(1) Postupak osnivanja naučnoistraživačkih instituta kao organizacionih jedinica u okviru visokoškolske ustanove na području Kantona obavlja se na način i u postupku propisanim Zakonom o visokom obrazovanju.

(2) Postupak osnivanja naučnoistraživačkih instituta kao ustanova vrši se na način propisan ovim zakonom.

(3) Uslovi za osnivanje naučnoistraživačkog instituta iz st. (1) i (2) ovog člana propisani su ovim zakonom.

(4) Osnivač naučnoistraživačkog instituta kao ustanove Ministarstvu podnosi zahtjev za osnivanje, uz koji obavezno prilaže elaborat o opravdanosti osnivanja, prijedlog statuta te dokaz o uplati sredstava u iznosu utvrđenom Odlukom Vlade za potrebe troškova vođenja postupka osnivanja od faze podnošenja zahtjeva do okončanja postupka po zahtjevu.

(5) Elaborat o opravdanosti osnivanja naučnoistraživačkog instituta obavezno sadrži: podatke o osnivaču, sjedište i naziv, ciljeve, opis i preciznu razradu djelatnosti, detaljan opis djelokruga rada, kadrovsku i infrastrukturnu opremljenost i način obezbjeđenja finansijskih sredstava za početak i daljnji rad naučnoistraživačkog instituta.

(6) Nakon dostavljanja urednog zahtjeva iz stava (4) ovog člana, Ministarstvo imenuje ekspertnu komisiju radi razmatranja zahtjeva i davanja stručnog mišljenja o usklađenosti elaborata u skladu sa odredbama ovog zakona.

(7) Akt o imenovanju ekspertne komisije iz stava (6) ovog člana obavezno sadrži opis poslova i zadataka, rok za izvršenje povjerenih poslova i zadataka, kao i druga pitanja relevantna za rad.

(8) U postupku osnivanja naučnoistraživačkog instituta kao ustanove podnosilac zahtjeva je obavezan ispred zvaničnog naziva instituta dodati odrednicu "Naučnoistraživački institut".

Član 17. (Rad ekspertne komisije i odluka Vlade)

(1) Ekspertnu komisiju iz člana 16. stav (6) ovog zakona, koja broji najmanje pet članova, imenuje Ministarstvo iz reda istaknutih naučnih radnika i stručnjaka iz odgovarajuće naučne oblasti, predstavnika osnivača i predstavnika Ministarstva, uz prethodno pribavljeno mišljenje Savjeta za nauku u pogledu kompetentnosti članova komisije.

(2) Izvještaj ekspertne komisije uz uredan zahtjev osnivača, Ministarstvo dostavlja Vladi, koja, u slučaju prihvatanja izvještaja i davanja saglasnosti na elaborat, zahtjev osnivača upućuje Skupštini na razmatranje i usvajanje.

(3) Odluka Vlade o elaboratu iz stava (2) ovog člana mora biti donesena najkasnije u roku od 60 dana od dana dostavljanja izvještaja ekspertne komisije Ministarstvu.

(4) U slučaju da je Vlada odbila dati saglasnost na elaborat zbog negativnog stručnog mišljenja ekspertne komisije, osnivač može tražiti da se imenuje posebna ekspertna komisija koja će ponovo razmotriti elaborat i razloge odbijanja davanja pozitivnog stručnog mišljenja od strane ekspertne komisije.

(5) U slučaju podnošenja zahtjeva za imenovanje posebne ekspertne komisije, osnivač je obavezan izvršiti uplatu dodatnih finansijskih sredstava za rad posebne ekspertne komisije i to u visini naknade koja je prethodno utvrđena za rad ekspertnoj komisiji.

(6) Akt o imenovanju posebne ekspertne komisije iz stava (4) ovog člana obavezno sadrži opis poslova u smislu ponovnog razmatranja elaborata i razloga odbijanja davanja pozitivnog mišljenja ekspertne komisije i Vlade, kao i rok za izvršenje povjerenih poslova.

(7) Izvještaj sa mišljenjem posebne ekspertne komisije, uz izvještaj sa mišljenjem ekspertne komisije, Ministarstvo dostavlja Vladi na razmatranje i odlučivanje.

(8) Protiv odluke Vlade nije dozvoljena žalba, ali se može pokrenuti upravni spor pred nadležnim sudom u Sarajevu u roku od 30 dana od dana prijema odluke.

Član 18. (Odluka Skupštine i rad komisije matičara)

(1) Odluka Skupštine o zahtjevu osnivača, mora biti donesena najkasnije u roku od četiri mjeseca od dana podnošenja Ministarstvu urednog zahtjeva iz člana 16. stav (4) ovog zakona.

(2) Odluka Skupštine iz stava (1) ovog člana je konačna i putem Ministarstva dostavlja se osnivaču.

(3) Nakon što Skupština donese odluku kojom se daje saglasnost za osnivanje naučnoistraživačkog instituta kao ustanove, osnivač imenuje komisiju matičara, čiji sastav treba biti u skladu sa odredbama ovog zakona koje se odnose na izbor u naučna i istraživačka zvanja, koja obavlja sljedeće poslove:

a) donosi statut;

b) objavljuje konkurs i vrši izbor u naučna i istraživačka zvanja u skladu sa zakonom;

c) objavljuje konkurs za izbor i imenovanje direktora;

d) objavljuje konkurs i vrši izbor članova upravnog i nadzornog odbora naučnoistraživačkog instituta kao ustanove;

e) preduzima ostale potrebne aktivnosti u procesu ispunjavanja uslova neophodnih za početak rada i daljnji rad naučnoistraživačkog instituta kao ustanove;

f) dostavlja osnivaču izvještaj o ispunjenosti uslova potrebnih za početak rada i daljnji rad naučnoistraživačkog instituta kao ustanove sa obrazloženim kalendarom aktivnosti i datumom početka rada.

(4) Nakon što komisija matičara dostavi izvještaj da je izvršila zadatke iz stava (3) ovog člana, osnivač donosi akt o osnivanju naučnoistraživačkog instituta kao ustanove.

Član 19. (Provjera ispunjenosti uslova od strane stručne komisije)

(1) Uz zahtjev za provjeru ispunjenosti uslova za početak rada i nastavak rada osnivač naučnoistraživačkog instituta kao ustanove Ministarstvu dostavlja:

a) odluku Vlade i Skupštine o davanju saglasnosti na elaborat o opravdanosti osnivanja naučnoistraživačkog instituta kao ustanove;

b) odluku osnivača o osnivanju naučnoistraživačkog instituta kao ustanove;

c) usvojen statut;

d) dokaz da ima najmanje deset zaposlenika iz reda naučnoistraživačkog osoblja od kojih najmanje 30% zaposlenika sa stepenom doktora nauka i izborom u zvanje iz odgovarajuće naučne oblasti i najmanje 30% zaposlenika sa stepenom magistra i izborom u zvanje iz odgovarajuće naučne oblasti;

e) dokaz da je imenovano vijeće naučnoistraživačkog instituta sastavljeno od najmanje pet članova od kojih najmanje 40% ima stepen doktora nauka i odgovarajući izbor u zvanje i 40% stepen magistra i odgovarajući izbor u zvanje;

f) dokaz da su izvršeni izbori u naučna i istraživačka zvanja u skladu sa ovim zakonom i statutom (ugovori o radu; prijava PIO/MIO);

g) dokaz da je za direktora imenovano lice sa stepenom doktora nauka;

h) dokaz da je osnivač obezbijedio prostor, opremu i sredstva u skladu sa elaboratom;

i) ispunjenost naprijed propisanih uslova od strane već osnovanih i novoosnovanih naučnoistraživačkih instituta vrši Ministarstvo svakih pet godina po proceduri koja je propisana ovim zakonom.

(2) Ispunjenost uslova iz stava (1) ovog člana provjerava se kod osnivanja naučnoistraživačkih instituta kao organizacione jedinice u okviru visokoškolske ustanove i kod osnivanja naučnoistraživačkog instituta kao ustanove.

(3) Po zahtjevu iz stava (1) ovog člana Ministarstvo imenuje stručnu komisiju za provjeru ispunjenosti uslova za početak rada naučnoistraživačkog instituta kao ustanove.

(4) Stručnu komisiju iz stava (3) ovog člana, koja broji najmanje pet članova, imenuje Ministarstvo iz reda istaknutih naučnih radnika i stručnjaka iz odgovarajuće oblasti sadržane u elaboratu, predstavnika osnivača naučnoistraživačkog instituta kao ustanove te predstavnika Ministarstva.

(5) Stručna komisija iz stava (3) ovog člana razmatra zahtjev, procjenjuje dokaze i na licu mjesta vrši provjeru ispunjenosti uslova propisanih ovim zakonom i pravilnikom iz stava (8) ovog člana.

(6) Nakon što stručna komisija iz stava (3) ovog člana provede postupak u skladu sa rješenjem o imenovanju, podnosi izvještaj o svom radu ministru sa mišljenjem o ispunjenosti propisanih uslova za početak rada i daljnji rad i prijedlogom u odnosu na donošenje rješenja kojim se novoosnovanom naučnoistraživačkom institutu kao ustanovi dozvoljava početak rada.

(7) Na osnovu rješenja o ispunjenosti uslova za početak rada novoosnovani naučnoistraživački institut kao ustanova upisuje se u Registar naučnoistraživačkih subjekata na području Kantona Sarajevo (u daljnjem tekstu: Registar).

(8) Postupak upisa i brisanja iz Registra iz stava (7) ovog člana, kao i ostala pitanja bitna za postupak osnivanja i daljnji rad naučnoistraživačkog instituta kao ustanove uredit će se pravilnikom koji donosi ministar.

(9) Registar iz stava (7) ovog člana vodi Ministarstvo.

(10) Ako naučnoistraživački institut kao ustanovu osnivaju dva ili više osnivača, njihovi međusobni odnosi, prava, obaveze i odgovornosti uređuju se ugovorom, koji se zaključuje u pisanoj formi, u kojem slučaju se ugovor dostavlja uz zahtjev iz stava (1) ovog člana.

DIO ŠESTI - NAUČNOISTRAŽIVAČKO OSOBLJE

Član 20. (Naučna i istraživačka zvanja)

(1) Naučna zvanja u smislu ovog zakona su:

- a) naučni savjetnik;
- b) viši naučni saradnik;
- c) naučni saradnik.

(2) Istraživačka zvanja u smislu ovog zakona su:

- a) stručni savjetnik;
- b) viši stručni saradnik;
- c) stručni saradnik.

(3) Ukoliko se na visokoškolskoj ustanovi ukaže potreba za sudjelovanjem naučnoistraživačkog osoblja koje je izabrano na osnovu ovog zakona u realizaciji nastavnog procesa i sudjelovanju u radu komisija, tim licima se za vrijeme trajanja angažmana, bez priznavanja naučnoistraživačkog zvanja kao akademskog zvanja koje je dodijeljeno shodno odredbama Zakona o visokom obrazovanju, priznaje samo uživanje prava članova akademskog osoblja u vezi sa izvođenjem nastavnog procesa odnosno rada u komisiji, i to:

- a) stručnom saradniku priznaju se prava asistenta,
- b) višem stručnom saradniku priznaju se prava višeg asistenta,
- c) stručnom savjetniku priznaju se prava višeg asistenta u drugom izbornom periodu, pod uslovom da je stekao stepen doktora nauka,
- d) naučnom saradniku priznaju se prava docenta,
- e) višem naučnom saradniku priznaju se prava vanrednog profesora,
- f) naučnom savjetniku priznaju se prava redovnog profesora.

(4) Za vrijeme angažmana odnosno sudjelovanja u realizaciji nastavnog procesa naučnoistraživačko osoblje ne stiče akademsko zvanje.

Član 21. (Oduzimanje zvanja)

(1) Naučnoistraživačko zvanje može biti oduzeto ako se dokaže da je lažno ili na temelju falsifikata naveden neki od uslova za izbor.

(2) O oduzimanju naučnoistraživačkog zvanja odluku donosi senat visokoškolske ustanove na prijedlog vijeća organizacione jedinice odnosno Ministarstvo na prijedlog vijeća naučnoistraživačkog instituta kao ustanove.

(3) Prijedlog za pokretanje postupka za oduzimanje naučnoistraživačkog zvanja može pokrenuti direktor, vijeće i učesnik u konkursu za izbor u naučnoistraživačko zvanje.

(4) Nakon prijema prijedloga za pokretanje postupka za oduzimanje naučnoistraživačkog zvanja vijeće organizacione jedinice odnosno vijeće naučnoistraživačkog instituta kao ustanove imenuje komisiju od pet (5) članova u istom ili višem zvanju u odnosu na zvanje kandidata koji je predmet postupka za oduzimanje naučnoistraživačkog zvanja.

(5) U komisiju iz stava (4) ovog člana ne mogu biti imenovani članovi komisije koji su bili članovi komisije u postupku u kojem je lice, protiv kojeg je pokrenut postupak, steklo naučnoistraživačko zvanje.

(6) Komisija iz stava (4) ovog člana provjerava osnovanost tvrdnji odnosno navoda iznesenih u prijedlogu za pokretanje postupka za oduzimanje naučnoistraživačkog zvanja i pisani izvještaj dostavlja direktoru. Direktor u roku od sedam dana, dostavlja izvještaj komisije predlagatelju postupka i licu protiv kojeg je pokrenut postupak na izjašnjenje u roku od sedam dana od dana prijema izvještaja.

(7) Nakon proteka roka iz stava (6) ovog člana, direktor saziva sjednicu vijeća najkasnije u roku od 30 dana od dostave odgovora predlagatelja pokretanja postupka i lica protiv kojeg je pokrenut postupak radi utvrđivanja prijedloga za oduzimanje naučnoistraživačkog zvanja.

(8) Na sjednicu vijeća pozivaju se predlagatelj i lice protiv kojeg je pokrenut postupak. Vijeće razmatra sve predložene dokaze i odlučuje o postojanju osnova za oduzimanje naučnoistraživačkog zvanja. Ako vijeće odluči da postoji osnova za oduzimanje naučnoistraživačkog zvanja, ono podnosi prijedlog o oduzimanju naučnoistraživačkog zvanja senatu visokoškolske ustanove odnosno Ministarstvu ukoliko se radi o naučnoistraživačkom institutu kao ustanovi, u roku od 7 dana od dana održavanja sjednice vijeća.

(9) Protiv odluke senata odnosno Ministarstva iz stava (8) ovog člana o oduzimanju naučnoistraživačkog zvanja nije dozvoljena žalba, ali se protiv iste može pokrenuti upravni spor pred nadležnim sudom u Sarajevu, u roku od 30 dana od dana prijema odluke.

(10) Oduzimanjem naučnoistraživačkog zvanja gube se sva prava koja su stečena osporenim izborom u naučnoistraživačko zvanje.

Član 22. (Sastav vijeća)

Vijeće naučnoistraživačkog instituta čini svi uposlenici u radnom odnosu sa punim radnim vremenom u tom institutu i koji posjeduju zvanje doktora nauka odnosno zvanje magistra.

Član 23. (Direktor instituta)

(1) Direktor naučnoistraživačkog instituta je organ rukovođenja institutom.

(2) Direktora instituta bira vijeće naučnoistraživačkog instituta, tajnim glasanjem, nakon provedene procedure javnog konkursa.

(3) Direktor instituta bira se na mandatni period od 4 (četiri) godine i može biti ponovo izabran. Isto lice može biti

imenovano za direktora na dva uzastopna mandata.

Član 24. (Uslovi i postupak za izbor direktora)

- (1) Za direktora naučnoistraživačkog instituta kao organizacione jedinice ili naučnoistraživačkog instituta kao ustanove može biti izabrano lice koje ima naučni stepen doktora nauka i izbor u zvanje naučnog savjetnika ili višeg naučnog saradnika.
- (2) Postupak izbora direktora pokreće vijeće organizacione jedinice ili naučnoistraživačkog instituta kao ustanove svojom odlukom najkasnije šest mjeseci prije isteka mandata direktora na dužnosti. Na istoj sjednici imenuje se komisija za provođenje postupka izbora direktora koja broji tri člana, a koji posjeduju zvanje doktora nauka. Prijavljeni kandidat za direktora ne može biti član komisije.
- (3) Konkurs za izbor direktora objavljuje se u najmanje jednom dnevnom listu i na web stranici visokoškolske ustanove, organizacione jedinice odnosno naučnoistraživačkog instituta kao ustanove. Rok za prijavljivanje kandidata je 15 dana od dana objavljivanja konkursa.
- (4) U prijavi za izbor direktora kandidati, pored dokumenata kojima dokazuju da ispunjavaju uslove predviđene Zakonom, prilažu: biografiju, opis naučnog/umjetničkog i stručnog rada te program rada i razvoja naučnoistraživačkog instituta za naredni mandatni period.
- (5) Nakon isteka roka za prijavljivanje kandidata, komisija u roku od sedam dana podnosi izvještaj vijeću o prijavljenim kandidatima odnosno o kandidatima koji ispunjavaju utvrđene uslove.
- (6) Direktor u roku od sedam dana od dana podnošenja izvještaja komisije saziva sjednicu vijeća na koju se pozivaju kandidati koji ispunjavaju uslove za izbor direktora koji na istoj sjednici javno prezentiraju svoj program rada i razvoja naučnoistraživačkog instituta.
- (7) Nakon javne prezentacije programa rada kandidata za izbor direktora, vijeće na istoj sjednici bira direktora.
- (8) Vijeće bira direktora tajnim glasanjem. Za direktora je izabran kandidat koji je dobio natpolovičnu većinu glasova od ukupnog broja članova vijeća.
- (9) Ukoliko se u postupku za izbor direktora prijavi jedan kandidat, a nakon obavljenog glasanja ne dobije potrebnu većinu glasova, glasanje se ponavlja još jednom. Ukoliko u ponovljenom glasanju kandidat ne dobije potrebnu većinu glasova, cjelokupni izborni postupak se ponavlja.
- (10) Ukoliko se u postupku za izbor direktora prijavi više kandidata, izabran je onaj kandidat koji dobije potrebnu većinu glasova. Ukoliko niti jedan kandidat ne dobije potrebnu većinu glasova, glasanje se ponavlja. U ponovljenom glasanju izbor se vrši između dva kandidata koji su dobili najveći broj glasova, odnosno između više njih ako su dobili jednak broj glasova. U ponovljenom glasanju izabran je onaj kandidat koji dobije potrebnu većinu glasova. Ukoliko u ponovljenom glasanju dva ili više kandidata dobiju podjednak broj glasova, glasanje se ponavlja još jednom. Ukoliko ni tada nijedan kandidat ne dobije potrebnu većinu glasova, cjelokupni izborni postupak se ponavlja.
- (11) Nakon donesene odluke o izboru, vijeće naučnoistraživačkog instituta kao organizacione jedinice visokoškolske ustanove dostavlja rektoru na potpis odluku o imenovanju direktora.
- (12) Nakon donesene odluke o izboru, vijeće naučnoistraživačkog instituta kao ustanove istu sa kompletnom konkursnom dokumentacijom dostavlja ministru radi pribavljanja saglasnosti na odluku o imenovanju direktora.
- (13) Rektor je dužan potpisati rješenje o imenovanju i isto proslijediti naučnoistraživačkom institutu kao organizacionoj jedinici radi dostavljanja obavještenja o tome prijavljenim kandidatima i to najkasnije sedam dana od dana prijema rješenja na potpis.
- (14) Ministar je dužan donijeti odluku iz stava (12) ovog člana i istu proslijediti naučnoistraživačkom institutu kao ustanovi radi dostavljanja obavještenja o tome prijavljenim kandidatima i to najkasnije sedam dana od dana prijema odluke vijeća.

(15) Odluka iz st. (13) i (14) ovog člana je konačna, a protiv iste se može pokrenuti upravni spor pred nadležnim sudom u Sarajevu.

(16) Na raspisani konkurs za izbor direktora mogu se prijaviti kandidati koji su zaposleni u naučnoistraživačkom institutu u momentu podnošenja prijave na konkurs.

(17) Direktor u toku mandata ne može vršiti funkciju člana upravnog odbora visokoškolske ustanove odnosno naučnoistraživačkog instituta kao ustanove niti može biti politički angažiran u stranačkom rukovodstvu, zakonodavnoj, izvršnoj ili sudskoj vlasti bilo kojeg nivoa vlasti.

(18) U postupku osnivanja naučnoistraživačkog instituta kao ustanove za direktora instituta može biti izabrano lice sa stepenom doktora nauka na period od četiri godine.

Član 25. (Imenovanje vršioca dužnosti direktora)

(1) U slučaju da se ne izvrši izbor direktora naučnoistraživačkog instituta, vijeće bez konkursa imenuje vršioca dužnosti direktora iz reda njegovih članova u naučnoistraživačkom zvanju, zaposlenog na institutu sa punim radnim vremenom, na period od najduže 6 (šest) mjeseci računajući od dana imenovanja.

(2) Prijedlog za vršioca dužnosti, u smislu stava (1) ovog člana, može dati svaki član vijeća naučnoistraživačkog instituta s tim što se izbor vrši glasanjem, većinom glasova od ukupnog broja njegovih članova.

(3) Vršilac dužnosti direktora naučnoistraživačkog instituta ima sva prava i dužnosti direktora.

(4) Istovremeno s imenovanjem vršioca dužnosti direktora naučnoistraživačkog instituta vijeće donosi odluku o ponovnom raspisivanju konkursa za izbor direktora.

(5) Direktor kojem je istekao drugi mandat ne može biti imenovan za vršioca dužnosti direktora.

Član 26. (Odluka o imenovanju)

(1) Odluka o imenovanju direktora sadrži:

- a) ime i prezime izabranog direktora,
- b) datum kada izabrani direktor stupa na dužnost i
- c) trajanje mandata.

(2) Prije preuzimanja dužnosti direktora izabrani kandidat obavezan je potpisati izjavu o prihvatanju dužnosti.

Član 27. (Prestanak mandata direktora)

Direktoru prestaje mandat u sljedećim slučajevima:

- a) istekom perioda na koji je izabran,
- b) donošenjem odluke kojom je prihvaćena ostavka,
- c) prijevremenim razrješenjem i

d) danom izbora na neku drugu funkciju nespojivu sa funkcijom direktora.

Član 28. (Prijevremeno razrješenje direktora)

(1) Vijeće naučnoistraživačkog instituta može donijeti odluku o razrješenju direktora i prije isteka perioda na koji je imenovan u sljedećim slučajevima:

- a) ako ostvaruje loše poslovne rezultate,
- b) ako mu je izrečena neka od mjera osiguranja u trajanju dužem od tri mjeseca - početkom primjene te mjere,
- c) ako ne izvršava zadatke predviđene Zakonom ili ih izvršava protivno Zakonu,
- d) ako prekorači ovlaštenja i time nanese štetu naučnoistraživačkom institutu,
- e) zbog odsutnosti ili spriječenosti da u neprekidnom periodu dužem od tri mjeseca obavlja dužnost i
- f) ako svojim ponašanjem povrijedi ugled funkcije direktora.

(2) Obrazložen prijedlog za razrješenje direktora, zbog jednog ili više razloga navedenih u prethodnom stavu ovog člana, vijeću može podnijeti:

- a) osnivač visokoškolske ustanove odnosno naučnoistraživačkog instituta kao ustanove,
- b) jedna trećina članova upravnog odbora visokoškolske ustanove,
- c) jedna trećina članova senata visokoškolske ustanove,
- d) rektor i
- e) jedna trećina članova vijeća naučnoistraživačkog instituta.

(3) Direktor je dužan sazvati sjednicu vijeća najkasnije 15 dana od dana prijema prijedloga iz stava (2) ovog člana i o tome obavijestiti rektora odnosno Ministarstvo.

(4) O prijevremenom razrješenju direktora vijeće odlučuje tajnim glasanjem, pri čemu je za donošenje odluke o razrješenju potrebna natpolovična većina glasova od ukupnog broja članova vijeća.

(5) U slučaju da vijeće odbije inicijativu za razrješenje direktora, nova inicijativa po istom osnovu ne može se podnijeti prije isteka roka od šest mjeseci od podnošenja prethodne.

Član 29. (Izbor u naučna i istraživačka zvanja u okviru visokoškolske ustanove)

(1) Izbor naučnoistraživačkog osoblja u naučna i istraživačka zvanja u organizacionoj jedinici u okviru visokoškolske ustanove vrši se u svim slučajevima javnim konkursom, u skladu sa kriterijima utvrđenim ovim zakonom, statutom i pravilnikom kojim se utvrđuju općeprihvaćeni standardi u datoj oblasti koji donosi ministar.

(2) Javni konkurs za izbor u naučnoistraživačko zvanje raspisuje nadležni organ visokoškolske ustanove na prijedlog vijeća u najmanje jednom dnevnom listu i internet stranici.

(3) Za pripremanje prijedloga za izbor vijeće organizacione jedinice imenuje komisiju od tri člana, a predloženi članovi komisije moraju biti u istom ili višem zvanju od zvanja u koje se kandidat bira, a uz prethodno pribavljenu pisanu saglasnost svakog predloženog člana komisije za angažman u komisiji.

(4) Većina članova komisije mora biti iz iste, a ostali članovi mogu biti iz srodne naučne oblasti za koju se kandidat bira.

- (5) Stručna služba organizacione jedinice obavezna je, prije dostavljanja pristiglih prijava na konkurs komisiji za izbor u zvanja, potvrditi, u pisanoj formi, potpunost i blagovremenost pristiglih prijava te naznačiti broj prijavljenih kandidata sa naznakom zvanja za koja su se kandidati prijavili.
- (6) Pisana potvrda iz stava (5) ovog člana dostavlja se rukovodiocu organizacione jedinice prije donošenja odluke o imenovanju komisije i predstavlja sastavni dio izvještaja komisije za izbor u zvanje.
- (7) Komisija iz stava (3) ovog člana obavezna je izvještaj sa prijedlogom za izbor u zvanje dostaviti vijeću u skladu sa tekstom raspisanog konkursa i aktom o imenovanju komisije i to u roku od 30 dana od isteka roka za podnošenje prijava na konkurs.
- (8) Rukovodilac organizacione jedinice obavezan je izvještaj sa prijedlogom komisije za izbor u zvanje uvrstiti u dnevni red sjednice vijeća u roku od 30 dana od dana dostavljanja izvještaja sa prijedlogom komisije.
- (9) Odluku o pitanjima izbora iz svoje nadležnosti vijeće donosi većinom glasova od ukupnog broja članova s tim da članovi vijeća prilikom glasanja ne mogu biti suzdržani.
- (10) Vijeće glasanjem utvrđuje prijedlog odluke o izboru i dostavlja je senatu na daljnje postupanje.
- (11) U slučaju da vijeće ne utvrdi pozitivan prijedlog odluke iz stava (10) ovog člana, odluka vijeća je konačna i protiv nje se može pokrenuti upravni spor pred nadležnim sudom u Sarajevu u roku od 30 dana od dana prijema odluke.
- (12) Rukovodilac organizacione jedinice je obavezan u roku od pet dana od dana održavanja sjednice vijeća na kojoj je utvrđen pozitivan prijedlog odluke o izboru isti dostaviti senatu na dalje postupanje.
- (13) Senat je obavezan donijeti odluku o izboru u zvanje u roku od 30 dana od dana prijema utvrđenog prijedloga odluke vijeća.
- (14) Odluka senata je konačna.
- (15) Rektor je obavezan u roku od pet dana od dana donošenja odluke o izboru u zvanje istu dostaviti rukovodiocu organizacione jedinice.
- (16) Ukoliko je odluka senata suprotna utvrđenom prijedlogu vijeća koje je prihvatilo izvještaj komisije, rektor je obavezan u roku od pet dana od dana njenog donošenja istu dostaviti organizacionoj jedinici sa odgovarajućim obrazloženjem radi ponovnog razmatranja i odlučivanja odnosno glasanja.
- (17) Rukovodilac organizacione jedinice obavezan je odluku vijeća u slučaju iz stava (16) ovog člana dostaviti senatu u roku od 30 dana na odlučivanje.
- (18) Senat će na prvoj narednoj sjednici, a najkasnije u roku 60 dana od dostavljanja odluke vijeća iz stava (17) ovog člana, donijeti konačnu odluku o izboru u zvanje, koja se dostavlja izabranom kandidatu i ostalim prijavljenim kandidatima putem organizacione jedinice.
- (19) Protiv odluke senata nije dozvoljena žalba, ali se može pokrenuti upravni spor pred nadležnim sudom u Sarajevu u roku od 30 dana od dana prijema odluke.

Član 30. (Izbor u naučna i istraživačka zvanja u okviru naučnoistraživačkog instituta kao ustanove)

- (1) Izbor u naučna i istraživačka zvanja u okviru naučnoistraživačkog instituta kao ustanove vrši se u svim slučajevima javnim konkursom, u skladu sa kriterijima utvrđenim ovim zakonom, statutom i pravilnikom kojim se utvrđuju općeprihvaćeni standardi u datoj oblasti koji donosi ministar.
- (2) Javni konkurs za izbor u naučnoistraživačko zvanje raspisuje naučnoistraživački institut kao ustanova na prijedlog vijeća naučnoistraživačkog instituta kao ustanove u najmanje jednom dnevnom listu i internet stranici naučnoistraživačkog

instituta kao ustanove, uz prethodnu saglasnost Ministarstva.

(3) Za pripremanje prijedloga za izbor u zvanje iz stava (2) ovog člana Ministarstvo imenuje komisiju od tri člana na prijedlog vijeća, a predloženi članovi komisije moraju biti u istom ili višem zvanju od zvanja u koje se kandidat bira, a uz prethodno pribavljenu pisanu saglasnost svakog predloženog člana komisije za angažman u komisiji.

(4) Dva člana komisije moraju biti iz iste, a treći član može biti iz srodne naučne oblasti za koju se kandidat bira.

(5) Stručna služba naučnoistraživačkog instituta kao ustanove obavezna je, prije dostavljanja pristiglih prijava na konkurs komisiji za izbor u zvanja, potvrditi, u pisanoj formi, potpunost i blagovremenost pristiglih prijava te naznačiti broj prijavljenih kandidata sa naznakom zvanja za koja su se kandidati prijavili.

(6) Pisana potvrda iz stava (5) ovog člana dostavlja se direktoru naučnoistraživačkog instituta kao ustanove koju prosljeđuje Ministarstvu prije donošenja odluke o imenovanju komisije i predstavlja sastavni dio izvještaja komisije za izbor u zvanje.

(7) Komisija iz stava (3) ovog člana obavezna je izvještaj sa prijedlogom za izbor u zvanje dostaviti vijeću u skladu sa tekstom raspisanog konkursa i aktom o imenovanju komisije i to u roku od 30 dana od isteka roka za podnošenje prijava na konkurs.

(8) Direktor naučnoistraživačkog instituta kao ustanove obavezan je izvještaj sa prijedlogom komisije za izbor u zvanje uvrstiti u dnevni red sjednice vijeća naučnoistraživačkog instituta kao ustanove u roku od 30 dana od dana dostavljanja izvještaja sa prijedlogom komisije.

(9) Odluku o pitanjima izbora iz svoje nadležnosti vijeće naučnoistraživačkog instituta kao ustanove donosi većinom glasova od ukupnog broja članova, s tim da članovi vijeća prilikom glasanja ne mogu biti suzdržani.

(10) Vijeće glasanjem utvrđuje prijedlog odluke o izboru i dostavlja je Ministarstvu radi donošenja odluke o davanju saglasnosti na utvrđeni prijedlog odluke vijeća.

(11) U slučaju da vijeće ne utvrdi pozitivan prijedlog odluke iz stava (10) ovog člana, odluka vijeća je konačna i protiv nje se može pokrenuti upravni spor pred Kantonalnim sudom u Sarajevu u roku od 30 dana od dana prijema odluke.

(12) Direktor naučnoistraživačkog instituta kao ustanove je obavezan u roku od pet dana od dana održavanja sjednice vijeća na kojoj je utvrđen pozitivan prijedlog odluke o izboru isti dostaviti Ministarstvu na dalje postupanje.

(13) Ministarstvo donosi odluku o davanju saglasnosti na utvrđeni prijedlog vijeća u roku od 30 dana od dana prijema utvrđenog prijedloga odluke vijeća.

(14) Ministarstvo je obavezno u roku od sedam dana od dana donošenja odluke iz stava (13) ovog člana istu dostaviti direktoru naučnoistraživačkog instituta kao ustanove.

(15) Nakon dostavljanja odluke iz stava (13) ovog člana, direktor naučnoistraživačkog instituta kao ustanove izdaje i potpisuje odluku o izboru u zvanje, koja se dostavlja izabranom kandidatu i ostalim prijavljenim kandidatima putem naučnoistraživačkog instituta.

(16) Odluka vijeća je konačna i protiv nje se može pokrenuti upravni spor pred Kantonalnim sudom u Sarajevu u roku od 30 dana od dana prijema odluke.

Član 31. (Minimalni uslovi za izbor u naučna i istraživačka zvanja)

(1) Minimalni uslovi za izbor u naučna i istraživačka zvanja su:

a) stručni saradnik: odgovarajuća visoka stručna sprema iz oblasti za koju se bira sa prosječnom ocjenom najmanje 8 ili 3,5, pokazane naučnoistraživačke sposobnosti;

- b) viši stručni saradnik: naučni stepen magistra iz oblasti za koju se bira sa prosječnom ocjenom najmanje 8 na postdiplomskom studiju ili stepen drugog ciklusa studija iz oblasti za koju se bira sa prosječnom ocjenom i na prvom i na drugom ciklusu studija najmanje 8 ili 3,5; pokazane naučnoistraživačke sposobnosti;
- c) stručni savjetnik: naučno zvanje doktora iz oblasti za koju se bira ili stepen trećeg ciklusa studija iz oblasti za koju se bira sa prosječnom ocjenom na prvom, drugom i trećem ciklusu studija najmanje 8 ili 3,5; pokazane naučnoistraživačke sposobnosti;
- d) naučni saradnik: naučno zvanje doktora iz oblasti za koju se bira ili stepen trećeg ciklusa studija iz oblasti za koju se bira sa prosječnom ocjenom na prvom, drugom i trećem ciklusu studija najmanje 8 ili 3,5; najmanje tri naučna rada iz oblasti za koju se bira objavljena u priznatim publikacijama; pokazane naučnoistraživačke sposobnosti;
- e) viši naučni saradnik: proveden najmanje jedan izborni period u zvanju naučnog saradnika, najmanje pet naučnih radova iz oblasti za koju se bira objavljenih u priznatim publikacijama, objavljena naučna knjiga i originalni naučni uspjeh kao što je naučni projekt, patent ili originalni metod, sve nakon izbora u zvanje naučnog saradnika;
- f) naučni savjetnik: proveden najmanje jedan izborni period u zvanju višeg naučnog saradnika, najmanje osam naučnih radova iz oblasti za koju se bira objavljenih u priznatim publikacijama, najmanje dvije objavljene naučne knjige i originalni naučni uspjeh kao što je naučni projekt, patent ili originalni metod, sve nakon izbora u zvanje višeg naučnog saradnika.
- (2) Odlukom ministra, a na prijedlog Savjeta za nauku, definisat će se poseban status jezika, književnosti, historije, kulture i umjetnosti te druge naučne/umjetničke oblasti od posebnog značaja za Bosnu i Hercegovinu te utvrditi dodatni kriteriji za izbor u naučna i istraživačka zvanja.
- (3) Učešće naučnoistraživačkog osoblja u realizaciji naučnoistraživačkog projekta od posebnog interesa za Kanton, u postupku izbora u isto ili više zvanje, vrednuje se kao naučni projekt, patent ili originalni metod, s tim da član naučnoistraživačkog osoblja može u toku izbornog perioda ostvariti vrednovanje najviše dva naučnoistraživačka projekta.
- (4) Vrednovanje učešća naučnoistraživačkog osoblja u realizaciji naučnoistraživačkog projekta od posebnog interesa za Kanton posebnim aktom priznaje odnosno verificira Ministarstvo, a akt Ministarstva služi kao dokaz u postupku izbora naučnoistraživačkog osoblja u isto ili više zvanje.
- (5) Pod naučnom knjigom iz ovog člana smatra se naučna knjiga definisana Zakonom o visokom obrazovanju.

Član 32. (Period izbora i statusna pitanja)

- (1) Naučnoistraživačko osoblje bira se na određeni izborni period, i to:
- a) stručni saradnik na period od četiri godine bez mogućnosti ponovnog izbora;
- b) viši stručni saradnik na period od pet godina s mogućnošću jednog ponovnog izbora;
- c) stručni savjetnik na period od pet godina s mogućnošću jednog ponovnog izbora;
- d) naučni saradnik na period od pet godina s mogućnošću jednog ponovnog izbora;
- e) viši naučni saradnik na period od šest godina s mogućnošću jednog ponovnog izbora;
- f) naučni savjetnik trajno.
- (2) Član naučnoistraživačkog osoblja u zvanju naučnog saradnika ili višeg naučnog saradnika može biti izabran u više zvanje i prije isteka perioda na koji je biran ukoliko ispuni uslove za izbor u više naučno zvanje i ukoliko je u postojećem zvanju proveo najmanje tri godine nakon posljednjeg izbora.
- (3) Član naučnoistraživačkog osoblja zaključuje ugovor o radu na period na koji je izabran, osim naučnog savjetnika, koji zaključuje ugovor o radu na neodređeno vrijeme.

(4) Nakon isteka izbornog perioda visokoškolska ustanova i naučnoistraživački institut kao ustanova obavezni su zaključiti novi ugovor o radu sa svakim članom naučnoistraživačkog osoblja koji je izabran u isto ili više naučno ili istraživačko zvanje.

(5) Rokovi za izbor u isto ili više zvanje naučnoistraživačkog osoblja produžit će se za vrijeme provedeno na porodiljskom odsustvu, bolovanju dužem od šest mjeseci, javnoj dužnosti ili iz drugih opravdanih razloga, u skladu sa zakonom, a što se preciznije utvrđuje statutom visokoškolske ustanove i naučnoistraživačkog instituta kao ustanove.

(6) Visokoškolska ustanova odnosno organizaciona jedinica i naučnoistraživački institut kao ustanova u roku od šest mjeseci od dana stupanja na snagu ovog zakona obavezni su donijeti program mjera za stvaranje uslova za napredovanje naučnoistraživačkog osoblja, kao i plan kadrovskih potreba za naredni petogodišnji period.

(7) Plan iz stava (6) ovog člana visokoškolska ustanova i naučnoistraživački institut kao ustanova, obavezni su dostaviti Ministarstvu odmah po njegovoj izradi, a izvještaj o provođenju programa iz stava (6) ovog člana na početku svake kalendarske godine.

(8) Član naučnoistraživačkog osoblja koji navršši 65 godina života i ispuni uslove za prestanak radnog odnosa ne može na osnovu konkursa biti biran u isto ili više zvanje.

(9) Član naučnoistraživačkog osoblja iz stava (8) ovog člana može ostati u radnom odnosu u naučnoistraživačkom institutu do navršene 70-te godine života, ukoliko nakon provedene konkursne procedure u skladu sa čl. 29. i 30. ovog zakona, na to mjesto nije izabran drugi član naučnoistraživačkog osoblja i ukoliko mu to omogućava odluka o izboru u zvanje, uz obavezu da o namjeri ostanka u radnom odnosu do 70-te godine života pisanim, putem upozna direktora naučnoistraživačkog instituta, šest mjeseci prije navršenih 65 godina života.

(10) Članu naučnoistraživačkog osoblja koji navršši 70 godina života prestaje mogućnost angažmana po bilo kojem osnovu u naučnoistraživačkom institutu, uz izuzetak profesora emeritusa.

Član 33. (Istek izbornog perioda i ugovor o radu)

Kada član naučnoistraživačkog osoblja nakon isteka izbornog perioda ne bude izabran u isto ili više zvanje, visokoškolska ustanova odnosno organizaciona jedinica i naučnoistraživački institut kao ustanova mogu, prije otkazivanja ugovora o radu, ponuditi članu naučnoistraživačkog osoblja zaključivanje novog ugovora o radu na poslovima za koje se ne traži izbor u naučnoistraživačko zvanje, ako za to postoji mogućnost i potreba, a što se preciznije definira statutom visokoškolske ustanove, odnosno naučnoistraživačkog instituta kao ustanove.

DIO SEDMI - NADZOR

Član 34. (Nadzor nad provođenjem zakona)

(1) Nadzor nad provođenjem ovog zakona i propisa donesenih na osnovu ovog zakona vrši Ministarstvo.

(2) Odgovorna tijela naučnoistraživačkog instituta kao organizacione jedinice ili ustanove obavezna su na zahtjev Ministarstva u zahtijevanom roku dostaviti sve tražene informacije i dokumente potrebne za izvršavanje nadležnosti.

(3) U vršenju nadzora Ministarstvo može, u cilju utvrđivanja relevantnih činjenica i okolnosti u svakom konkretnom slučaju, zatražiti od nadležne inspekcije za oblast obrazovanja provođenje radnji u skladu sa zakonom i dostavljanje informacije o utvrđenom stanju i preduzetim mjerama.

(4) Nadležna inspekcija za oblast obrazovanja obavezna je, u posljednjoj sedmici mjeseca novembra, dostaviti Ministarstvu izvještaj o provedenim inspekcijskim pregledima u tekućoj godini, o utvrđenom stanju, pojavama i problemima, kao i o preduzetim mjerama, sa prijedlogom mjera i aktivnosti koje bi trebalo preduzeti za preveniranje, kao i otklanjanje

utvrđenog nezakonitog djelovanja.

Član 35. (Inspekcijski nadzor)

(1) Inspekcijski nadzor nad provođenjem ovog zakona, provedbenih propisa, kao i akata i odluka tijela/organa naučnoistraživačkog instituta kao organizacione jedinice ili ustanove donesenih u cilju izvršenja obaveza utvrđenih ovim zakonom vrši inspekcija za oblast obrazovanja, u skladu sa zakonom.

(2) Kada u vršenju inspekcijskog nadzora nadležna inspekcija utvrdi da naučnoistraživački institut kao organizaciona jedinica ili ustanova ne ispunjava uslove za rad odnosno postupa suprotno odredbama ovog zakona, odredit će primjeren rok za otklanjanje utvrđenih nedostataka i o tome obavijestiti osnivača odnosno Ministarstvo.

(3) Ukoliko naučnoistraživački institut kao organizaciona jedinica ili ustanova nakon isteka utvrđenog roka iz stava (2) ovog člana ne otkloni utvrđene nepravilnosti nadležna inspekcija će o tome dostaviti obavijest Ministarstvu s ciljem donošenja rješenja o zabrani daljeg rada i brisanja istog iz Registra iz člana 19. stav (7) ovog zakona.

(4) Ministarstvo će donijeti rješenje o zabrani daljnjeg rada i po službenoj dužnosti izvršiti brisanje naučnoistraživačkog instituta kao organizacione jedinice ili ustanove iz Registra.

(5) Kada nadležna inspekcija utvrdi nepravilnosti u radu koje ne sprečavaju daljnji rad naučnoistraživačkog instituta kao organizacione jedinice ili ustanove odnosno kada utvrdi da isti ne postupa u skladu sa Zakonom ili postupa nepravilno ili nepotpuno prema obavezama koje su joj određene propisima, obavezna je prema utvrđenom činjeničnom stanju naložiti odgovarajuće upravne mjere i to:

a) narediti da se utvrđeni nedostaci i nepravilnosti otklone na način i u roku kako je određeno ovim zakonom ili ukoliko takav rok nije propisan odrediti primjereni rok u skladu sa zakonom;

b) narediti preduzimanje odgovarajućih upravnih radnji i mjera radi otklanjanja utvrđenih nepravilnosti ili nedostatka u roku i na način kako je naloženo;

c) narediti odgovarajuće upravne mjere za potpunu i pravilnu primjenu ovog zakona, drugih propisa i akata donesenih na osnovu ovog zakona;

d) zabraniti preduzimanje radnji za koje utvrdi da su u suprotnosti sa ovim zakonom, provedbenim propisima i aktima donesenim u cilju provođenja ovog zakona;

e) izdati prekršajni nalog;

f) podnijeti zahtjev za pokretanje prekršajnog postupka;

g) podnijeti izvještaj nadležnom organu o učinjenom krivičnom djelu;

h) preduzeti druge mjere i radnje za koje je zakonom i drugim propisima ovlaštena.

(6) Nadležna inspekcija upravne mjere nalaže rješenjem. Protiv rješenja inspekcije može se izjaviti žalba Ministarstvu u roku od osam dana od dana prijema rješenja.

(7) Žalba na rješenje iz stava (6) ovog člana ne odlaže izvršenje rješenja.

DIO OSMI - KAZNE NE ODREDBE

Član 36. (Kazne za prekršaje)

(1) Novčanom kaznom u iznosu od 1.000 KM do 5.000 KM kaznit će se za prekršaj naučnoistraživački institut kao organizaciona jedinica ili ustanova, ako:

a) obavlja djelatnost suprotno ovom zakonu;

b) vrši statusne promjene suprotno ovom zakonu ili Zakonu o visokom obrazovanju za organizacione jedinice u okviru visokoškolske ustanove;

c) dodjeljuje naučna i istraživačka zvanja ili vrši izbor naučnoistraživačkog osoblja koje ne ispunjava uslove za izbor propisane ovim zakonom i provedbenim propisima;

d) zaključi ugovor o radu sa članom naučnoistraživačkog osoblja suprotno ovom zakonu;

e) izvršava aktivnosti za koje nije zakonom ovlašten;

f) izvrši izbor direktora suprotno uslovima ili proceduri koja je propisana ovim zakonom;

g) ne izvrši naloženu upravnu mjeru u roku i na način kako je naloženo rješenjem nadležne inspekcije.

(2) Novčanom kaznom u iznosu od 500 KM do 3.000 KM kaznit će se za prekršaj odgovorno lice naučnoistraživačkog instituta kao organizacione jedinice ili ustanove, ako:

a) imenuje komisiju za pripremanje prijedloga za izbor suprotno ovom zakonu;

b) ne osigura da se propisane radnje u postupku izbora naučnoistraživačkog osoblja provedu u rokovima propisanim ovim zakonom.

(3) Za prekršaje iz stava (1) ovog člana kaznit će se i odgovorno lice za zastupanje naučnoistraživačkog instituta kao organizacione jedinice ili ustanove u pravnom prometu.

DIO DEVETI - PRELAZNE I ZAVRŠNE ODREDBE

Član 37. (Implementacijske mjere i nastavak rada)

(1) Savjet za nauku će pripremiti nacrt Strategije za razvoj nauke najkasnije u roku od devet mjeseci od dana imenovanja i isti dostaviti Ministarstvu radi upućivanja nacrta Vladi u daljnju proceduru.

(2) Prijedlog Strategije za razvoj nauke iz stava (1) ovog člana Vlada će uputiti na usvajanje Skupštini u roku od 30 dana od dana utvrđivanja prijedloga.

(3) Osnivanje naučnoistraživačkih instituta kao ustanova vršit se u skladu sa ovim zakonom i Strategijom za razvoj nauke.

(4) Postupci osnivanja kao i druge statusne promjene započete prema odredbama propisa koji su važili prije stupanja na snagu ovog zakona završit će se prema tim propisima.

(5) Postupak izbora u naučna i istraživačka zvanja koja su započeta prema odredbama propisa koji su važili prije stupanja na snagu ovog zakona završit će se prema tim propisima.

(6) Nakon isteka izbornog perioda u naučno ili istraživačko zvanje koje je izvršeno prije stupanja na snagu ovog zakona, izbor u isto ili više zvanje vršit će se prema odredbama ovog zakona.

(7) Naučnoistraživačko osoblje koje je birano u zvanje prema odredbama zakona koji stupanjem na snagu ovog zakona prestaje da važi, a koje se nalazi u prvom izbornom periodu ima pravo nakon isteka izbornog perioda ostati u tom zvanju i to bez provođenja konkursne procedure najduže za vremenski period koji je za to zvanje propisan ovim zakonom.

(8) Nakon isteka izbornog perioda u slučaju iz stava (7) ovog člana, procedura izbora u naučnoistraživačko zvanje se provodi prema odredbama ovog zakona.

(9) Ministarstvo će u roku od 60 dana od dana stupanja na snagu ovog zakona donijeti odluku o utvrđivanju priznatih publikacija koje se vrednuju, na svim visokoškolskim ustanovama, kao i naučnoistraživačkim institutima kao ustanovama na području Kantona, u postupku izbora u naučnoistraživačka zvanja, kao i pravilnik o klasifikaciji naučnih oblasti, polja i grana, a sve uz prethodno provedene konsultacije sa svim visokoškolskim ustanovama, kao i naučnoistraživačkim institutima kao ustanovama na području Kantona.

(10) Ministarstvo će u roku od 30 dana od dana stupanja na snagu ovog zakona donijeti pravilnik iz čl. 19. stav (8), 29. stav (1) i 30. stav (1) ovog zakona.

(11) Postupak provjere ispunjenosti uslova iz člana 19. stav (1) ovog zakona za institute koji su osnovani prije stupanja na snagu ovog zakona Ministarstvo provodi nakon proteka roka od tri godine od dana stupanja na snagu ovog zakona.

Član 38. (Prestanak primjene)

Danom stupanja na snagu ovog zakona prestaje primjena Zakona o naučnoistraživačkoj djelatnosti ("Službene novine Kantona Sarajevo", broj 10/04).

Član 39. (Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-20035/16
30. maja 2016. godine
Sarajevo

Predsjedateljica
Skupštine Kantona Sarajevo
Prof. **Ana Babić**, s. r.

Hvala što ste naš pretplatnik. Koristite pogodnosti koje dobijate pretplatom.

O nama

Javno preduzeće Novinsko-izdavačka organizacija SLUŽBENI LIST BOSNE I HERCEGOVINE. Sva prava pridržana. 2014

Adresa

Džemala Bijedića 39/III
71000 Sarajevo
Bosna i Hercegovina
Email: sllist@sllist.ba (mailto:sllist@sllist.ba)

Kontakti

Centrala

Tel: 033/722-030

Email (<mailto:info@sllist.ba>)

Uredništvo

Tel: 033/722-038

Email (<mailto:urednistvo@sllist.ba>)

Pravna služba

Tel: 033/722-051

Email (<mailto:info@sllist.ba>)

Računovodstvo

Tel: 033/722-045, Fax: 033/722-046

Email (<mailto:racunovodstvo@sllist.ba>)

Pretplata

Tel: 033/722-054

Email (<mailto:pretplata@sllist.ba>)

Ekspedit

Tel: 033/722-041

Email (<mailto:info@sllist.ba>)

Prodaja

Tel: 033/722-079

Email (<mailto:info@sllist.ba>)

Oglasni odjel

Tel: 033/722-049 i 033/722-050, Fax: 033/722-074

Email (<mailto:oglasi@sllist.ba>)

Tehnički sekretar

Tel: 033/722-061, Fax: 033/722-064

Ured direktora

Tel: 033/722-061

Komercijala

Tel: 033/722-042